



PREZIDÉNSIA
KONSELLU
MINISTRUS
VIII GOVERNUN KONSTITUSIONÁL



Gabinete
Portavós

Komunikadu Imprensa

Sorumutuk Konsellu Ministrus nian iha loron 9 fulan-fevereiru tinan 2022

Konsellu Ministrus hala'o sorumutuk iha Palásiu Governu, iha Dili, no aprova ho alterasaun ba projetu Dekretu-Lei, ne'ebé apresenta husi Ministru Koordinadór Asuntus Ekonómikus, Joaquim Amaral, kona-ba **Estrutura Orgánika Inspesaun-Jerál Traballu nian (IJT)**.

Diploma ida-ne'e ho objetivu atu halo reestruturasaun no reorganizasaun ba IJT, liuhusi loke tan ninia estrutura orgánika, ho kriasaun direasaun nasional no delegasaun territoriál sira ne'ebé presiza tanba aumentu husi relasaun serbisu sira ne'ebé atu fiskaliza.

Expansaun ida-ne'e tenke tulun Estadu atubele garante hodi hadi'a kondisaun sira serbisu nian ida ne'ebé efektivu ba ema hotu ne'ebé servisu iha Timor-Leste.

Ministru Koordinadór Asuntus Ekonómikus, apresenta mós projetu Dekretu-Lei ne'ebé aprova ona ho alterasaun ne'ebé ho objetivu atu aprova **medida sira atu reforsa distribuisaun sesta bázika ba família timoroan sira ne'ebé presiza liu no apoiu ba operadór ekonómiku lokal sira, no ne'ebé kria rejime espesial ida kona-ba aprovizionamentu ne'e rasik, iha ámbitu planu recuperasaun ekonómika nian.**

Ho projetu dekretu-lei ida-ne'e, Governu hakarak kontinua disponibiliza produktu sira nesesidade dahuluk nian, nune'e, iha sorin seluk, atu garante sustentabilidade família sira nian, no iha tempu hanesan atu kria kondisaun sira ba normalidade atividade husi produtór no operadór ekonómiku nasional nian hodi hasoru prokura ne'ebé menus.

Sesta bázika ne'e fiksa ho valór másimu hosi dolar amerikanu 50 ba membru benefisiáriu ida-idak iha uma-kain no sei distribui durante tinan 2022 nia laran. Sesta bázika ne'e kompostu husi produktu ai-han no sasán sira ijiene pesoál nian, ne'ebé deskriasaun, kuantidade no folin sei define liuhusi despaxu konjuntu hosi membru



Palácio do Governo,
Avenida Presidente Nicolau Lobato,
Dili, Timor-Leste



PREZIDÉNSIA KONSELLU MINISTRUS

VIII GOVERNUN KONSTITUSIONÁL



Gabinete
Portavós

Governu sira ne'ebé responsavel iha área komérsiu no indústriá no kooperativa sira. Lubun hosi produktu ida-ne'e bele troka ho "voucher" hodi sosa sasán sira.

Medida Sesta Bázika ne'e limita ba ema sira ne'ebé presiza liu apoiu ai-han, ne'ebé tuir lei hakerek ona iha "Livru Rejistu Uma Kain nian". La inklui iha lista benefisiáriu sidadaun nian, membru sira hosi nia uma kain, ne'ebé nu'udar titulár órgaun soberania no titulár kargu diresaun ka xefe departamentu sira husi servisu Administrasaun Públika direta ka indireta Estadu nian. Nune'e mós la inklui sidadaun sira ho sira-nia membru "Uma Kain" ho rendimentu fulan-fulan boot liu dolar amerikanu 500.

Ho diploma ida-ne'e, prosesu akizisaun no distribuisaun sesta bázika nian bele halo de'it hosi kooperativa no operadór ekonómiku sira ne'ebé kria ona tuir lei, ne'ebé laiha dívida ba autoridade tributária no maioria husi kapitál sosiál sociedade nian sidadaun timoroan sira maka kaer.

Aprova mós projetu Dekretu-Lei, ne'ebé apresenta husi Ministru Asuntus Kombatentes Libertasaun Nasionál, Júlio Sarmiento da Costa "Meta Mali", **alterasaun dahituk ba Dekretu-Lei n. 15/2008, lora 4 fulan-juñu, kona-ba pensaun kombatente no martir sira libertasaun nasional nian.** Projetu Dekretu-Lei ida-ne'e ho objetivu atu atribui kompeténsia ba Administrasaun Konsellu Kombatentes Libertasaun Nasionál hodi aprova regra sira kona-ba movimentasaun konta bankária nian ho intensaun atu depozita retensaun sira kona-ba pensaun kombatente no martir sira libertasaun nasional nian, ba administrasaun no prestasaun kontas ba fundu ne'e rasik.

Projetu Rezolusaun Governu nian, apresenta husi Ministra Saúde, Odete Freitas Belo, ne'ebé aprova **Política Nasionál kona-ba Planeamentu Familiár** nian mós hetan aprovasaun.

Política ida-ne'e ho objetivu atu adapta konseitu sira planeamentu familiár nian ne'ebé integradu no apropriadu tuir kultura ho kontestu Timor-Leste nian, hodi



Palácio do Governo,
Avenida Presidente Nicolau Lobato,
Dili, Timor-Leste



PREZIDÉNSIA KONSELLU MINISTRUS

VIII GOVERNUN KONSITUSIONÁL



Gabinete
Portavós

konsidera kompromisu polítiku ne'ebé motiva ona adezaun nasional ba Planu Asaun Konferénsia Internasionál ba Populasaun no Dezenvolvimentu.

Planeamentu familiár ne'e importante tebes atu hamenus mortalidade inan ho empoderamentu inan-feton sira nian, hanesan liuhusi asaun sira akonsellamentu jenétiku no konjugál nian, informasaun ba métodu no fornimentu meius kontrasesaun, tratamentu infertilidade, prevensaun ba moras sira husi tranzmisaun seksuál no rastreiu (buka-hatene sinál sira) kankru jenital nian. Métodu sira planeamentu familiár nian mós nu'udar instrumentu privilejiadu ba defeza saúde inan no oan sira nian, prevensaun ba abortu no defeza ba saúde no kualidade moris família sira nian.

Projetu Rezolusaun Governu nian kona-ba **donativu ba Representasaun Permanente Repúblika Árabe Saaraui Demokrátika nian**, ne'ebé propoin husi Vise-Ministru Negósius Estranjeirus no Kooperasaun, Julião da Silva, hetan aprovasaun husi Konsellu Ministrus.

Medida ida-ne'e reforsa lasu istóriu sira ne'ebé kesi Timor-Leste no Repúblika Árabe Saaraui Demokrátika, bazeia ba dezeju komún hodi luta ba autodeterminasaun, iha prinsípiu solidariedade ho povu nia luta ba libertasaun nasional no direitu ba ninia autodeterminasaun no ukun-rasik an, ne'ebé hatuur iha Konstituisaun Repúblika, iha Rezolusaun Parlamentu Nasionál nian kona-ba solidariedade no apoiu ba povu Saaraui, no iha realidade Timor-Leste kontribui, husikedas tinan 2011, ba fursionamentu Representasaun Permanente ne'e nian iha Dili, liuhusi fó subsidiu anuál hodi hala'o ninia atividade sira iha Timor-Leste no iha rejiaun.

Konsellu Ministrus aprova projetu ba Proposta Rezolusaun Parlamentu Nasionál nian, ne'ebé apresenta mós husi Vise-Ministru Negósius Estranjeirus no Kooperasaun, ba ratifikasaun **Akordu kona-ba Mobilidade entre Estados-Membru hosi Komunitade sira País Lian Portugés nian (CPLP)**.



Palácio do Governo,
Avenida Presidente Nicolau Lobato,
Dili, Timor-Leste



PREZIDÊNCIA KONSELLU MINISTRUS

VIII GOVERNUN KONSTITUSIONÁL



Gabinete
Portavós

Akordu ida-ne'e aprova ona iha Sorumutuk Konsellu Ministrus *CPLP* nian ba da-26, ne'ebé hala'o iha Luanda, Angola, iha loron 16 fulan-jullu tinan 2021.

Akordu kona-ba Mobilidade ne'e nu'udar Akordu-kuadru ida ne'ebé estabese baze legál kona-ba oinsá sei harii mobilidade no sirkulasaun ida boot liu iha espasu *CPLP* nian, no permite atu promove fasilitasaun ba sirkulasaun sidadaun sira husi país-membru sira iha espasu *CPLP* nian.

Aprova mós projetu Rezolusaun Governu nian, ne'ebé apresenta husi Ministru Administrasaun Estatál, Miguel Pereira de Carvalho, ba **akizisaun boletin votu nian ne'ebé sei utiliza ba eleisaun prezidensiál tinan 2022**. Haree ba urjénsia iha akizisaun boletin votu nian ne'ebé nesesáriu ba realizaun eleisaun Prezidente Repúblika nian, liuhusi Rezolusaun Governu ida-ne'e, fó ona autorizasaun ba Sekretariadu Tékniku Administrasaun Eleitorál (STAE) hodi hahú prosedimentu aprovizionamentu nian liuhusi ajuste diretu no define ona katak produsaun ba boletin votu sira ne'e sei hala'o husi Imprensa Nasionál Timor-Leste nian.

Konsellu Ministrus aprova projetu Rezolusaun Governu nian, ne'ebé apresenta husi Vice-Primeiru-Ministru no Ministru Planu no Ordenamentu, José Maria dos Reis, ne'ebé determina **elaborasaun ba Planu Nasionál Ordenamentu Territóriu Timor-Leste (PNOT-TL)**.

PNOT-TL ne'e sei elabora husi Ministériu Planu no Ordenamentu, liuhosi Diresaun-Jerál Ordenamentu Territóriu nian no sei sai hanesan instrumentu ba planeamentu territoriál ne'ebé define kuadru estratéjiku ba organizaun no utilizaun territoriál nasional nian, hodi apresenta objetivu, prinsípiu no estratéjia sira ne'ebé Estadu asume, haree ba karakterístika jeográfika, ekolójika no ambientál sira iha territóriu, ba ninia dinámika demográfika, sosiál no ekonómika no ba vokasaun funksionál no produtiva sira hosi espasu sira ne'ebé diferente.

Planu ida-ne'e mós sei estabese orientasaun sira ne'ebé atu konsidera iha elaborasaun ba instrumentu sira seluk sistema nasional ba planeamentu no jestaun territoriál no kompatibilizasaun polítika públika setoriál sira Estadu nian, nune'e



Palácio do Governo,
Avenida Presidente Nicolau Lobato,
Dili, Timor-Leste



PREZIDÉNSIA KONSELLU MINISTRUS

VIII GOVERNUN KONSTITUSIONÁL



Gabinete
Portavós

mós, bainhira presiza, hodi salvaguarda valór no rekursu sira ne'ebé rekoñese hanesan interese nasional.

Konsellu Ministrus aprova mós projetu deliberasaun ida, ne'ebé apresenta husi Sekretáriu Estadu Protesaun Sivil, Joaquim José Gusmão dos Reis Martins, ne'ebé substitui Vise-Ministru Interiór nian, kona-ba **alterasaun dahuluk ba kontratu konstrusaun Kuartél-Jenerál Polísia Nasionál Timor-Leste nian (PNTL)**.

Kontratu ba konstrusaun ne'e asina ona iha lora 26 fulan-janeiru tinan 2018, entre Estadu Timor-Leste no Shanghai Construction Group Co., Ltd. Maibé hafoin hahú ezekeusaun kontratu, haree katak projetu ne'e iha erru no bele kauza seguransa konstrusaun nian. Estudu sira ne'ebé hala'o ona, konklui katak presiza halo alterasaun ba projetu konstrusaun nian ho objetivu atu bele reforsa fundasaun sira.

No ikusliu, Ministru Justisa, Manuel Cárceres da Costa, apresenta ba Konsellu Ministrus **opsaun sira polítika lejizlativa nian ne'ebé sai hanesan baze ba iniciativa kona-ba prosedimentu akizisaun nian ba sidadaun nasional sira ho beins imovel sira ne'ebé uluk pertense ba sidadaun estranjeiru sira nian ne'ebé fó fila ona ba Estadu. REMATA**



Palácio do Governo,
Avenida Presidente Nicolau Lobato,
Dili, Timor-Leste